

U ovom broju, između ostalog, čitajte:

- Poslodavci od Elektroprivrede BiH traže da hitno stornira ugovore o rezervnom snabdijevanju kojima im je cijena struje povećana i do šest puta
- UPFBiH uputilo zaključke sa sastanka u vezi sa poskupljenjem cijene električne energije Elektroprivredi FBiH i Vlade FBiH
- Udruženje poslodavaca FBiH i Unija udruženja poslodavaca RS: Poziv političarima da rade na stabilizaciji političkih prilika u BiH
- Rukovodstvo UPFBiH, ministar rada i socijalne politike i direktor Zavoda za zapošljavanje FBiH o liberalizaciji uvoza deficitarne radne snage
- UPFBiH uputilo inicijativu za produženje važenja Upute o načinu realiziranja obustavljanja polazaka, povrataka, odnosno voznih redova, u uvjetima pandeme korona virusa
- Održana sjednica UO Udruženja poslodavaca Kantona Sarajevo



UPFBiH: Elektroprivreda BiH firmama šalje ugovore sa šest puta većom cijenom struje u odnosu na prošlogodišnju

Ovakvim postupanjem Uprava Elektroprivrede BiH direktno izigrava i krši odluke Parlamenta FBiH

Udruženje poslodavaca Federacije Bosne i Hercegovine šokirano je postupanjem Uprave Javnog poduzeća Elektroprivreda BiH, kao i izostankom reakcije nadležnih institucija na samovolju koju provode.

Iako su oba doma Parlamenta Federacije BiH usvojila dopunu Zakona o električnoj energiji FBiH kojom se daje ovlaštenje Vladi FBiH da ograniči povećanje cijene električne energije na 20 posto u odnosu na prethodnu godinu, a koji je stupio na snagu 06.01.2022. godine, EPBiH ne postupa u skladu sa odlukom Parlamenta FBiH.

Naime, u posljednja tri dana iz JP Elektroprivreda BiH brojnim kompanijama su dostavljeni ugovori za rezervno snabdijevanje električnom energijom na 60 dana čija je cijena i do šest puta veća u odnosu na prošlogodišnju, a navodno će od 1.3.2022. godine slati ugovore o redovnom snabdijevanju električnom energijom, koji bi, opet navodno, biti u skladu sa Zakonom o dopuni Zakona o električnoj energiji u FBiH.



Prema informacijama kojima raspolaže UPFBiH, ni novi ugovori neće biti usklađeni sa ovim Zakonom, jer će Elektroprivreda BiH sve troškove rizika prebaciti na kupca električne energije.

Ovakvim postupanjem, Uprava Elektroprivrede BiH direktno izigrava i krši odluke najvišeg

zakonodavnog tijela u Federaciji BiH – Parlamenta FBiH i odredbe dopune zakona koje su donijeli zastupnici i delegati Federalnog parlamenta.

UPFBiH će u petak, 28.1.2022. godine održati sastanak članica na kojemu će se razgovarati o novonastaloj situaciji i donijeti odluke o daljnim aktivnostima UPFBiH i kompanija u FBiH kojima je snabdjevač električnom energijom Elektroprivreda BiH.

UPFBiH očekuje hitno reagiranje Ministarstva energetike, rudarstva i industrije FBiH i Vlade FBiH kojom će zaustaviti samovoljno i nezakonito postupanje Uprave Elektroprivrede BiH.

Poslodavci od Elektroprivrede BiH traže da hitno stornira ugovore o rezervnom snabdijevanju kojima im je cijena struje povećana i do šest puta



Udruženje poslodavaca Federacije Bosne i Hercegovine će se hitno obratiti Upravi Javnog poduzeća Elektroprivrede BiH sa zahtjevom da hitno storniraju ugovore koje su poslali kompanijama za rezervno snabdijevanje električnom energijom na 60 dana, čija je cijena i do šest puta veća u odnosu na prošlogodišnju, zaključeno je na sastanku kojemu je prisustvovalo više od stotinu poslodavaca iz cijele Federacije BiH koje električnom energijom snabdijeva Javno poduzeće Elektroprivreda BiH. Sastanak je organiziralo Udruženje poslodavaca Federacije Bosne i Hercegovine.

Poslodavci od Elektroprivrede BiH traže da stornira račune i ispostavi nove račune o

snabdijevanju električnom energijom kompanijama koje je snabdijevala u 2021. godini, bez obzira da li su ti kupci poslali zahtjev za ponudu za snabdijevanje električnom energijom, prihvatili ponudu za snabdijevanje električnom energijom i potpisali ugovor ili nisu prihvatili ponudu za snabdijevanje električnom energijom i nisu potpisali ugovor.

Također se zahtijeva da u novim ugovorima osnovica za porast cijena električne energije do 20 posto je cijena električne energije iz godišnjeg ugovora tog kupca za prethodnu godinu, prije poskupljenja električne energije.

Dalje se navodi da se uvećane cijene električne energije primjenjuju od 06.01.2022. godine, odnosno, od dana stupanja na snagu Zakona o dopuni Zakona o električnoj energiji u FBiH na sve kvalifikovane kupce električne energije.



Jednoglasno je zatraženo da ugovori o snabdijevanju električnom energijom kvalifikovanim kupcima, koji će biti ponuđeni na osnovu člana 16a. Zakona o dopuni Zakona o električnoj energiji u FBiH moraju imati iste uslove snabdijevanja (npr. u pogledu termina plaćanja, promjene cijena snabdijevanja tokom trajanja ugovora, više sile i sl.), kao i ugovori o snabdijevanju električnom energijom koji su realizovani tokom 2021. godine.

Naglašavamo da ukoliko Elektroprivreda BiH ne prihvati naše zahtjeve, tražimo hitnu sjednicu Vlade Federacije BiH na kojoj će se donijeti odluka u skladu sa našim zahtjevima.

UPFBiH će pripremiti zahtjev za autentično tumačenje člana 16a. Zakona o dopuni Zakona o električnoj energiji u FBiH od Parlamenta FBiH.

Poslodavci su zaključili da će ugovore o rezervnom snabdijevanju vratiti Elektroprivredi BiH, uz zahtjev da se dostavi ugovor o rezervnom snabdijevanju zaključno sa 05.01.2022. te ugovori o snabdijevanju električnom energijom počev od 06.01.2022. u skladu sa pomenutim Zakonom i odlukom Vlade Federacije BiH o ograničenju rasta cijena električne energije BiH.



UPFBiH uputilo zaključke sa sastanka u vezi sa poskupljenjem cijene električne energije Elektroprivredi FBiH i Vlade FBiH

Udruženje poslodavaca FBiH će napraviti Zahtjev za autentično tumačenje člana 16a. Zakona o dopuni Zakona o električnoj energiji


Udruženje poslodavaca Federacije Bosne i Hercegovine 28. januara 2021. godine organizovalo je sastanak kojem je prisustvovalo više od stotinu poslodavaca iz cijele Federacije BiH, a na kojem razmatrana je aktuelna situacija u vezi sa poskupljenjem cijene električne energije i jednoglasno su usvojeni sljedeći zaključci:

- Zahtijevamo od Uprave Javnog preduzeća Elektroprivrede BiH da hitno storniraju ugovore koje su poslali kompanijama za rezervno snabdijevanje električnom energijom na 60 dana, čija je cijena i do šest puta veća u odnosu na prošlogodišnju.



- Od JP Elektroprivrede BiH se traži da stornira račune i da ispostavi nove račune o snabdijevanju električnom energijom koje je snabdijevala u 2021. godini, bez obzira da li su ti kupci poslali zahtjev za ponudu za snabdijevanje električnom energijom, prihvatili ponudu za snabdijevanje električnom energijom i potpisali ugovor, ili nisu prihvatili ponudu za snabdijevanje električnom energijom i nisu potpisali ugovor.

- U novim ugovorima osnovica za porast cijena električne energije do 20 posto maksimalno, je cijena električne energije iz godišnjeg ugovora tog kupca uz prethodnoj godini prije poskupljenja električne energije.



- Uvećane cijene električne energije primjenjuju se od 06.01.2022. godine, odnosno od dana stupanja na snagu Zakona o dopuni Zakona o električnoj energiji u FBiH na sve kvalifikovane kupce električne energije.

- Ugovori o snabdijevanju električnom energijom kvalifikovanim kupcima, koji će biti ponuđeni na osnovu člana 16a. Zakona o dopuni Zakona o električnoj energiji u FBiH moraju imati iste uslove snabdijevanja (npr. u pogledu termina plaćanja, promjena cijena snabdijevanja tokom trajanja ugovora, više sile i sl.), kao i ugovori o snabdijevanju električnom energijom koji su realizovani tokom 2021. godine.
- Ukoliko JP Elektroprivreda BiH ne prihvati naše zahtjeve, tražimo hitnu sjednicu Vlade Federacije BiH na kojoj će se donijeti odluka u skladu sa našim zahtjevima.
- Udruženje poslodavaca FBiH će napraviti Zahtjev za autentično tumačenje člana 16a. Zakona o dopuni Zakona o električnoj energiji u FBiH i hitno ga uputiti Parlamentu FBiH.
- Poslodavci su zaključili da će ugovore o rezervnom snabdijevanju vratiti JP Elektroprivredi BiH, uz zahtjev da se dostavi ugovor o rezervnom snabdijevanju zaključno sa 05.01.2022. godine, te ugovor o snabdijevanju električnom energijom počev od 06.01.2022. godine u skladu sa pomenutim Zakonom i Odlukom Vlade Federacije BiH o ograničavanju povećanja cijena snabdijevanja električnom energijom.

Zaključci su upućeni Elektroprivredi BiH i premijeru Vlade FBiH.

Udruženje poslodavaca FBiH i Unija udruženja poslodavaca RS: Poziv političarima da rade na stabilizaciji političkih prilika u BiH

Negativna politička retorika nanosi velike štete privredi i negativno utiče na životni standard građana



Udruženje poslodavaca Federacije Bosne i Hercegovine i Unija udruženja poslodavaca Republike Srpske pozivaju najviše predstavnike političkih partija i institucije na svim nivoima u Bosni i Hercegovini da učine najveće napore sa ciljem stabilizacije političkih prilika u zemlji.

Negativna politička retorika kojoj svjedočimo u posljednje vrijeme nanosi velike štete privredi i negativno utiče na životni standard građana. Nestabilna politička situacija u Bosni i Hercegovini ne samo da odbija nove investitore, nego uzrokuje povlačenje ili zaustavljanje započetih investicija. Značajan broj izvozno orijentiranih kompanija susreće se sa problemom potpunog otkazivanja postojećih ili nemogućnosti dobivanja novih narudžbi, a kao razlog strani partneri navode političku nestabilnost u Bosni i Hercegovini. Na ovaj način direktno su ugrožene privredne aktivnosti u zemlji, radna mjesta, ali i javni prihodi.

Zbog svega navedenog, a u interesu privrede i građana, Udruženje poslodavaca Federacije Bosne i Hercegovine i Unija udruženja poslodavaca Republike Srpske upućuju apel političkim

predstavnicima da poduzmu konkretne korake u pravcu stabilizacije političke situacije. Politički predstavnici moraju imati na umu da svojim djelovanjem u pravcu stabiliziranja političke situacije, rade u interesu građana i privrede.

U tom smislu, poslodavci smatraju da je potrebno što prije omogućiti neometano funkcioniranje institucija izvršne i zakonodavne vlasti, kako bi se omogućilo donošenja odluka i zakona neophodnih za jačanje stabilnosti i poboljšanje poslovnog ambijenta.

Pored navedenog, pozivamo predstavnike izvršne i zakonodavne vlasti na svim nivoima u Bosni i Hercegovini da što prije započnu aktivnosti na donošenju ključnih reformskih zakona s ciljem poboljšanja poslovnog ambijenta i jačanja ekonomije.

Rukovodstvo UPFBiH, ministar rada i socijalne politike i direktor Zavoda za zapošljavanje FBiH o liberalizaciji uvoza deficitarne radne snage

Istaknut problem koji se odnosi na dugotrajnost procedura za uvoz deficitarne radne snage



Na inicijativu Udruženja poslodavaca FBiH, 26. januara 2022. godine održan je sastanak rukovodstava UPFBiH, predsjednika Adnana Smailbegovića i direktora Mladena Pandurevića sa

federalnim ministrom rada i socijalne politike Veskom Drljačom i direktoricom Federalnog zavoda za zapošljavanje Helenom Lončar.

Sastanak je održan na temu Liberalizacije uvoza deficitarne radne snage, a kako bi poslodavci predstavili probleme sa kojima se susreću u smislu nedostatka radne snage, kao i moguća rješenja pomenutog problema. Naime, uslijed nedostatka radne snage, uzrokovanog prije



svega emigracijama, poslodavci sve više posežu za uvozom radne snage, kako bi odlazak kvalifikovanih ljudi iz Bosne i Hercegovine, nadomjestili radnom snagom iz dugih država.

Predstavnici Udruženja poslodavaca u Federaciji BiH su istakli problem koji se odnosi na dugotrajnost procedura za uvoz deficitarne radne snage, te druge probleme u vezi sa



zapošljavanjem stranaca, a što u nedostatku domaće radne snage otežava poslovanje. Također, razgovarano je o pravnom okviru kojim su uređena navedena pitanja jer se radi o oblasti koja je u većem dijelu uređena propisima na državnom nivou.

S obzirom da je tokom sastanka razgovarano o načinima rješavanja prepoznatih prepreka, izražena je spremnost svih učesnika da se u narednom periodu utvrde konkretni koraci za rješavanje prepoznatih problema, kao i mehanizmi za njihovo rješavanje od strane nadležnih institucija.

UPFBiH uputilo inicijativu za produženje važenja Upute o načinu realiziranja obustavljanja polazaka, povrataka, odnosno voznih redova, u uvjetima proglašene nesreće izazvane pandemijom korona virusa (COVID- 19) i etapnog početka održavanja javnog linijskog prijevoza putnika

Udruženje poslodavaca Federacije BiH uputilo je 25.01.2022. godine Ministarstvu prometa i komunikacija FBiH inicijativu za produženje važenja Upute o načinu realiziranja obustavljanja polazaka, povrataka, odnosno voznih redova, u uvjetima proglašene nesreće izazvane pandemijom korona virusa (COVID-19) i etapnog početka održavanja javnog linijskog prijevoza putnika.

Naime, veći broj članica Udruženja poslodavaca FBiH zatražilo je da se omogući produženje roka za privremeno obustavljanje održavanja pojedinog polaska, odnosno povratka, ili reda vožnje u FBiH.



Ministarstvo prometa i komunikacija Federacije Bosne i Hercegovine raspisalo je Javni oglas o pokretanju postupka privremenog obustavljanja održavanja pojedinog polaska, odnosno povratka ili reda vožnje u Federaciji BiH 14.05.2020. godine i donijelo pomenutu uputu 14.05.2020. godine.

Prijevoznicima je data mogućnost da privremeno obustave održavanje pojedinog polaska, odnosno povratka, ili voznog reda u cijelosti najduže do 31.12.2020. godine. Taj rok je dva puta produžen donošenjem izmjena i dopuna Upute. Obzirom da rok ističe 31.01.2022. godine, UPFBiH je pozivalo ministra da donese izmjene i dopune Upute i blagovremeno produži rok do 31.12.2022. godine.



Udruženje navodi da je u članu 6. Javnog oglasa propisano je da se rok može produžiti u zavisnosti od općeg stanja i posljedica izazvanih pandemijom korona virusa, te imajući u vidu da je pandemija izazvana virusom

COVID-19 još uvijek aktuelna i da je obavljanje poslovanja i dalje otežano. Dalje se navodi da je produženje roka sasvim opravdano obzirom da su i dalje na snazi mjere za sprečavanje širenja COVID-19 koje preporučuju smanjen obim kretanja građana.

Prijedlog Udruženja poslodavaca Federacije Bosne i Hercegovine je u skladu sa mjerama koje su na snazi u susjednim državama i pojedinim državama Europske unije. Također, u Republici Srpskoj, u cilju sprečavanja širenja korona virusa, prijevoznici javnog prevoza lica do daljnjeg, odnosno dok traju mjere koje se provode radi zaštite stanovništva mogu redukovati polaske na autobuskim linijama na način da se minimalno zadovolje potrebe korisnika javnog prevoza lica.


Produženjem roka u velikoj bi mjeri olakšalo prijevoznicima, čija je djelatnost zbog pojave COVID-19 znatno ugrožena i kojima je neovisno o njihovoj volji onemogućeno obavljanje pojedinog prijevoza. Prema informacijama članica UPFBiH koje se bave prijevozom putnika, obim prijevoza putnika u javnom linijskom prijevozu je smanjen na oko 65% od obima prijevoza u istom periodu 2019. godine.

Anketa o opravdanosti donošenja Zakona o postupku inspekcijskog nadzora FBiH

Udruženje je uz konsultacije s relevantnim akterima i ekspertima, kreiralo tekst ovog zakona

Udruženje poslodavaca u Federaciji Bosne i Hercegovine u procesu je prikupljanja podataka za istraživanje koje ima za cilj utvrditi opravdanost donošenja Zakona o postupku inspekcijskog nadzora u Federaciji Bosne i Hercegovine. Udruženje je u okviru projekta "Poslovanje bez korupcije", uz najšire konsultacije s relevantnim akterima i ekspertima, kreiralo tekst ovog zakona.

U cilju promovisanja slobodnog protoka ljudi, roba i usluga u jedinstvenom ekonomskom prostoru kroz eliminisanje prepreka za ravnopravnu konkurenciju na tržištu i uspostavljanjem jedinstvenog sistema inspekcijskog nadzora u Federaciji Bosne i Hercegovine,



predlaže se donošenje Zakona o postupku inspekcijskog nadzora u Federaciji BiH koji bi, kao jedinstven procesni zakon stvorio pretpostavke da se navedeni cilj i realizuje. Uspostavljanjem jedinstvenog procesnog zakona po kojem bi inspektori svih nivoa vlasti u Federaciji provodili postupke inspekcijskog nadzora po jedinstvenim koracima, u svakom slučaju bi značajno olakšalo poslovanje poslovnim subjektima i doprinijelo stvaranju povoljnije poslovne klime, a time i povoljnijeg ambijenta za privlačenje investitora.

Zakon o postupku inspekcijskog nadzora u Federaciji BiH je namijenjen svim nivoima inspekcijskih organa, sa osnovnim ciljem da ujednači postupanje inspektora, te da omogući pravnu sigurnost i identične obaveze i prava subjekata nadzora s jedne, ali i prava i obaveze inspekcijskih organa s druge strane.

Anonimnoj anketi možete pristupiti na [linku](#). Rezultati istraživanja i analize bit će publicirani i prezentirani javnosti, te dostavljeni zakonodavnoj i izvršnoj vlasti u Federaciji BiH u okviru naših zagovarakćih aktivnosti koje za cilj imaju da se Zakon usvoji.



Vlada FBiH utvrdila iznos najniže plaće u FBiH

Za 2022. godine utvrđen neto iznos od 543 KM

Federalna vlada je 07. januara 2022. godine na telefonski održanoj sjednici, donijela Odluku da se najniža plaća za period od 1. januara do 31. decembra 2022. godine utvrđuje u neto iznosu od 543 KM.

Uz mjesečnu plaću, većina radnika u Federaciji BiH također ostvaruje pravo na neoporezive naknade poput toplog obroka, prijevoza i regresa. Ove naknade u prosjeku po zaposlenom iznose 174 KM, tako da povećanje najniže plaće garantira ukupna primanja koja su znatno viša od najniže plaće i koja će za većinu radnika biti najmanje 717 KM mjesečno.




Nadalje, novi propisi sada garantiraju da će najniže plate biti usklađivane godišnje u zavisnosti od rasta ekonomije i cijena, počevši od 2023. godine.

Nakon što Parlament Federacije BiH usvoji nove fiskalne zakone, bit će stvorene pretpostavke za još veći rast najniže plaće bez štetnih posljedica za privredu i zaposlenost.

[Odluka o iznosu najniže plaće za 2022. godinu](#)

Održana sjednica UO Udruženja poslodavaca Kantona Sarajevo



Na XXV sjednici Upravnog odbora Udruženja poslodavaca KS, održanoj 18. januara 2022. godine, jednoglasno je podržan prijedlog da kompanija Alternativa d.o.o. bude kandidat za Šestoaprilsku nagradu Grada Sarajeva iz oblasti privrede.

Kao dugogodišnji član Udruženja poslodavaca Kantona Sarajevo i Federacije BiH te komorskih udruženja na prostoru Bosne i Hercegovine, kompanija Alternativa daje puni doprinos na stvaranju povoljnijeg poslovnog ambijenta za sve privredne subjekte koji svoj rad baziraju na poštivanju zakonskih regulativa, redovnom izmirenju obaveza prema uposlenicima i propisanih poreza i doprinosa. Kompanija Alternativa daje puni doprinos u razvoju djelatnosti kojom se bavi, uspješno promovira grad Sarajevo kao privredni, kulturni i politički centar Bosne i Hercegovine. Ova kompanija dugi niz godina pruža i nesebičnu pomoć socijalno ugroženim kategorijama.

Na sjednici je razmatrano i pitanje izmjene Zakona o turizmu KS, odnosno njegovih odredbi kojima se uređuje obaveznost, visina i način obračuna plaćanja članarine Turističkoj zajednici KS. Usvojen je zaključak kojim se nalaže stručnoj službi UPKS da sačini analizu Zakona i svih podzakonskih akata, te da sačini inicijativu za izmjenama kojim će reducirati ili ukinuti ovaj parafiskalni namet. Nakon toga zatražit će se sastanak s ministrima privrede i finansija Vlade KS na kojem će se prezentovati inicijativa. Također je zaključeno da će se navedeni problem predstaviti i na sjednici Ekonomsko-socijalnog vijeća za područje Kantona Sarajevo s ciljem iznalaženja rješenja u saradnji sa socijalnim partnerima.



Upravni odbor je izviješten o nepovoljnom položaju u koji su trenutno dovedeni privredni subjekti time što im još uvijek nisu dostavljeni novi ugovori za kupovinu električne energije od strane Elektroprivrede BiH. Naime, kako je Parlament FBiH izmjenama Zakona o električnoj energiji propisao maksimalno povećanje cijene električne energije do 20%,

novi ugovori, koji bi trebali biti usklađeni s izmjenama Zakona i Odlukom Vlade FBiH, još uvijek nisu dostavljeni. Zaključeno je da će se od Vlade FBiH i Udruženja poslodavaca FBiH tražiti promptna reakcija kako bi se otklonila neizvjesnost po ovom pitanju.

Predsjednik Safudin Čengić je izvijestio Upravni odbor o realizaciji zaključaka koji su usvojeni na prethodnoj tematskoj sjednici Vlade Kantona Sarajevo. Utvrđeno je da je veoma mali broj zaključaka implementiran, te je zaključeno da će se uputiti dopis Vladi Kantona Sarajevo sa zahtjevom da se ovi zaključci hitno implementiraju.

Također, Čengić je izvijestio UO o zaključcima sa prethodne sjednice Ekonomsko-socijalnog vijeća za područje Kantona Sarajevo na kojoj su iznesene primjedbe Udruženja poslodavaca KS na Nacrt Zakona o



komunalnim taksama. U dijelu koji se odnosi na kaznene odredbe Zakona za koje je utvrđeno da postoji izrazito visoka razlika između minimalnih i maksimalnih kazni, Udruženje je zahtijevalo da se taj omjer reducira kako bi se smanjio, između ostalog, i rizik od nastanka koruptivnih radnji inspeksijskih organa. Ovaj prijedlog nije naišao na odobrenje Sindikata, ali je zaključeno da će se primjedbe Udruženja uputiti ka Vladi KS.

Naglašeno je i da je planirana druga tematska sjednica Vlade KS na temu "Stečaj – nova šansa ili propast" koja će se održati u februaru 2022. godine. Predsjednik UP je pozvao sve članove UO da se aktivno uključe u pripremu za tematsku sjednicu, te da daju svoje prijedloge i iznesu svoja iskustva o stečajnom postupku.

Održana sjednica ESV-a ZDK



Na 30. sjednici ESV-a ZDK, održanoj 27. januara 2022. potpisan je Aneks sporazuma o osnivanju ESV za područje ZDK prema kojem svi socijalni partneri u ESV-u imaju po pet članova.

Također, razmatrana je Informacija o stanju u oblasti zapošljavanja u ZDK za 2021. godinu na koju su poslodavci imali sugestiju u smislu da bi se sa evidencije Zavoda za zapošljavanje trebalo brisati oko 24.000 nezaposlenih koji su na evidenciji samo zbog zdravstvene zaštite, te je delegacija poslodavaca predložila izmjenu Zakon o zdravstvenoj zaštiti i na federalnom i na kantonalnom nivou kako bi svi nezaposleni imali pravo na zdravstvenu zaštitu bez obzira da li su prijavljeni na evidenciji Zavoda za zapošljavanje.

Socijalni partneri su dali punu podršku Vladi ZDK za pronalaženje rješenja za sistemsko rješavanje problema nezaposlenosti i gorućeg problema na tržištu rada, odnosno odlivu radne snage.

U nastavku sjednice socijalni partneri su jednoglasno podržali donošenje Zakona o izmjenama Zakona o pripadnosti javnih prihoda u FBiH, zauzevši jednoglasan stav da je ovo put kojim će se ispraviti dugogodišnja nepravda učinjena prema kantonima, koji su generatori privrednog razvoja FBiH.

Preminuo jedan od osnivača i prvi predsjednik UO UPFBiH Tomislav Grizelj, UPFBiH organizuje komemoraciju




Rukovodstvo i uposlenici Udruženja poslodavaca Federacije Bosne i Hercegovine sa tugom i žalošću su primili vijest o iznenadnoj smrti Tomislava Grizelja, jednog od osnivača i prvog predsjednika Upravnog odbora Udruženja poslodavaca FBiH i Asocijacije poslodavaca BiH, vlasnika kompanije za termoenergetiku, plinsku tehniku, tretman i transport vode "Grizelj" d.d. i jednog od najuspješnijih bh. biznismena.

Bio je jedan od osnivača Udruženja poslodavaca Federacije Bosne i Hercegovine i Asocijacije poslodavaca Bosne i Hercegovine, te prvi predsjednik upravnog odbora obje organizacije.

Njegove aktivnosti na samom početku Udruženja poslodavaca FBiH podrazumijevale su organizaciju ovog udruženja po kantonima te uspostavu Ekonomsko-socijalnog vijeća FBiH, s ciljem stvaranja korektnijih odnosa sa Sindikatom i Vladom FBiH. Uz njegov angažman, smanjene su stope poreza i doprinosa na plaće sa 107 posto na 70 posto. Pokrenuo je brojne inicijative, između ostalih i inicijativu o reformi javnog sektora pod nazivom "Buldožer" koja je rezultirala značajnim pomacima u poslovnom ambijentu na cjelovitom tržištu BiH.

Dao je izuzetan doprinos u razvoju i afirmaciji ugleda Udruženja u cilju da se glas poslodavaca čuje na svim nivoima vlasti UPFBiH i aktivno učestvuje u kreiranje poslovne politike, kao i izuzetan dugogodišnji uspješan rad u organima Udruženja i Asocijacije.



Direktno je učestvovao u gasifikaciji grada Sarajeva, izradi i održavanju mašinskih postrojenja za potrebe ZOI"84.

Tokom agresije na BiH i nakon nje učestvovao je u hitnim sanacijama i obnovi Sarajeva, ali i cijele BiH. Godine 1991. je proglašen za menadžera godine Republike Bosne i Hercegovine, a sponzorirao je Konferenciju o obnovi Sarajeva 1994. godine.

Bio je na čelu kompanije koja je uz vlastiti "know how" pokrenula proizvodnju za termoenergetiku, gasnu tehniku, tretman i transport vode.

Autor je i koautor i učestvovao je u izradi brojnih standarda, stručnih knjiga, publikacija iz oblasti u kojoj je djelovao, a posebno upravljanja okolišem.

Dobitnik je priznanja menadžer godine Kantona Sarajevo 2000. godine, Federacije BiH 1997. i 1999. godine, najmenadžer 2002. BiH, a zatim i menadžer desetljeća 2002. i Šestoapriilske nagrade Grada Sarajeva 2005. godine.

Svojim privrednim i društvenim angažmanom promovirao je Sarajevo u zemlji i svijetu, a 2004. godine postao je i član Historical Society WHO is WHO.

Dobar dio svog vremena posvetio je društvenom angažmanu i nesebično doprinosiso općem dobru putem niza asocijacija.

Održana komemoracija Tomislavu Grizelju




Povodom smrti jednog od osnivača i prvog predsjednika Upravnog odbora Udruženja poslodavaca FBiH i Asocijacije poslodavaca BiH, vlasnika kompanije za termoenergetiku, plinsku tehniku, tretman i transport vode "Grizelj" d.d. i jednog od najuspješnijih bh. biznismena Tomislava Grizelja, Udruženje poslodavaca FBiH i porodica organizirali su komemoraciju u prostorima Općine Centar.

Direktor Udruženja poslodavaca Federacije BiH Mladen Pandurević kroz prisjećanja na Tomislava Grizelja kazao je između ostalog da je bio uvijek tačan, odgovoran prema poslu, te rekao da je Grizelj svojim načinom rada mijenjao odnos prema poslu.

Predsjednik Udruženja poslodavaca FBiH Adnan Smailbegović podsjetio je da se ove godine navršava 20 godina od kada je 30 poslodavaca osnovalo Udruženje čiji je prvi predsjednik bio Tomislav Grizelj.

"Beskrajno smo tužni što se danas za vječnost opraštamo od našeg Tomislava Grizelja, prvog predsjednika Upravnog odbora Udruženja poslodavaca FBiH. Tomo, kako smo ga zvali, bio je idealan izbor u vrijeme kada se trebalo izboriti da se glas poslodavaca, onih koji rade i stvaraju novu vrijednost, čuje u vladama, parlamentima, na mjestima gdje se odlučuje – u javnosti. Zalaganje i predan rad Tomislava Grizelja rezultirao je da se brojne kompanije pridruže UPFBiH i da zajednički radimo na stvaranju boljeg poslovnog ambijenta za privredu u FBiH i BiH. Bio je predan i posvećen socijalnom dijalogu, zastupajući stav da samo zajednički rad i kompromisna



rješenja mogu voditi ka prosperitetu i napretku. Tomislav Grizelj je bio veliki zaljubljenik Bosne i Hercegovine, entuzijasta koji je za dobro svoje domovine i svih njenih građana predano radio i djelima svakodnevno dokazivao ljubav prema Sarajevu i BiH", istakao je Smailbegović.

Smailbegović je također istakao da je Tomislav Grizelj bio čovjek sa strategijom i dugoročnom vizijom.

"Kao vlasnik kompanije za termoenergetiku, plinsku tehniku, tretman i transport vode "Grizelj" bio jedan od najuspješnijih biznismena u Bosni i Hercegovini, a njegov rad i djelovanje ostavili su neizbrisiv trag u Sarajevu. Ugradio je sebe i svoje znanje u neke od najvećih, slobodno možemo reći, historijskih poduhvata u Sarajevu i Bosni i Hercegovini. Učestvovao je u gasifikaciji grada Sarajeva te izradi i održavanju mašinskih postrojenja za potrebe 84. Brojna priznanja za najmenadžera koja je Tomislav Grizelj dobio tokom uspješne poduzetničke karijere, tek su djelić stvarne vrijednosti i zahvalnosti njegovog doprinosa razvoju, a naročito oporavku Sarajeva i BiH u periodu nakon rata. U cijelosti predan svome pozivu, nesebično je dijelio svoje ogromno znanje. Tomislava Grizelja, pamtit ćemo najprije kao velikog čovjeka, odanog prijatelja i predanog borca za napredak i boljitak svih", kazao je Smailbegović.

Predsjednik Asocijacije nezavisnih intelektualaca Krug 99 Adil Kulenović istakao je da je Tomislav Grizelj bio čovjek koji je visoko uvažavao nauku.

"Sljedeći upravo naučne principe i rezultate, uspijevaio je da poveže ljude, interese biznisa, ali i da da poticaj u kreiranju svega onoga što bi bila jedna Bosna i Hercegovina koja bi bila potaman za sve ljude" kazao je Kulenović.

Tomislav Grizelj je ugradio svoje bogato iskustvo u izgradnji profesionalnih standarda na kojima danas počiva Udruženje poslodavaca FBiH, kao respektabilno udruženje koje okuplja više od 22.000 članica. Tomislav Grizelj je dao izuzetan doprinos u razvoju i afirmaciji ugleda Udruženja, ali i kroz dugogodišnji uspješan rad u organima Udruženja.

Veliko, ljudsko srce Tomislava Grizelja uvijek je duboko saosjećalo sa ljudima kojima je potrebna pomoć. Bio je posvećen humanitarnom radu, humanitarac koji je živio da pomaže onima kojima je pomoć bila najpotrebnija.

Nova članice UPFBiH - Aluminij industrija d.o.o.



Osnovan 1975. godine, a pod sadašnjim imenom posluje od 1977. godine, sa godišnjim proizvodnim kapacitetom od više od 180.000 metričkih tona, Aluminij je najveći bosanskohercegovački izvoznik. Kao stub bh. proizvodne baze i cjelokupne ekonomije, aluminijska industrija, koju

vodi isključivo fabrika Aluminij, podržava hiljade visokokvalitetnih proizvodnih poslova i podupirućih poslova.

Sa svojom najmodernijom opremom, strateškom lokacijom i dobro razvijenim cestama, željeznicom i morskim lukama, Aluminij se pozicionira kao vodeći europski proizvođač aluminija s pristupom europskim, bliskoistočnim i azijskim tržištima. Danas, kao dio M.T. Abraham Group, Aluminij ponovo postaje globalni lider u aluminijumu.

Više o kompaniji pročitajte na [stranici kompanije](#).

Nova članica Grupacije poslodavaca ZDK pri UPFBiH - Tisakomerc d.o.o.

Tisakomerc d.o.o. je proizvodno-trgovačka firma koja djeluje na BiH i EU tržištu. Kompanija se bavi se proizvodnjom i distribucijom vijčane robe, okova, metalnih dijelova, tekstila, brizganjem plastike i izvozom namještaja.



Svojim proizvodima snabdijevaju proizvodne firme iz područja drvne industrije (fabrike namještaja), metalne industrije, tekstilne industrije i građevinarstva, stovarišta/baucentre, prodavnice željezne robe i plastike na malo te obrtničke firme iz oblasti namještaja, metalne industrije i građevinarstva.

Više o kompaniji pročitajte [OVDJE](#).

Nova članica Grupacije poslodavaca ZDK pri UPFBiH - SIM-KOMERC d.o.o.

SIM-KOMERC d.o.o. Kakanj je proizvodno-prometno preduzeće osnovano 1991. godine u Kakanju.

Osnovna djelatnost preduzeća je posredovanje i trgovina na malo i veliko građevinskim materijalom, elektro opremom, sanitarnom

opremom, željeznom robom, instalacijskim materijalom, opremom za vodovod i grijanje, tehničkim i specijalnim plinovima i drugim materijalima i robama. Pored trgovine kompanija se bavi proizvodnjom PVC podloški za prozore, tiplova sidro i PVC nogica za namještaj, izvođenjem građevinskih radova kao i izvozom i uvozom građevinskog materijala. Preduzeće uspješno obavlja svoju djelatnost na domaćem i regionalnom tržištu zahvaljujući povjerenju i porodičnim vrijednostima u poslovanju, sposobnosti uposlenika, timskom radu i tradicijom dugom 20 godina. Poslovni partneri ove kompanije su iz Bosne i Hercegovine, Hrvatske, Srbije, Slovenije, Turske i drugih zemalja regiona.



Nova članica Grupacije poslodavaca ZDK pri UPFBiH - SSAMplast d.o.o.



Poduzeće SSAMplast d.o.o. tržišni uspjeh potvrđuje širokom listom zadovoljnih klijenata iz oblasti energetike, rudarstva, drumskog saobraćaja, sporta i ugostiteljstva. Poduzeće je u privatnom vlasništvu i osnovano je 1981. godine kao samostalna radnja. Posjeduje TÜV SÜD i certifikat XL CODE.

Iz svoje usluge kompanija nudi veliki izbor proizvoda od materijala kao što su plastificirane tkanine, tehnički tekstil, PVC platna, PVC folija, mesh, papir, itd. Neki od proizvoda koje nudimo su ventilacijske cijevi, kamionske cerade, tende, bilbordi, digitalna štampa itd. Više o kompaniji pročitajte [OVDJE](#).

Nova članica Grupacije poslodavaca ZDK pri UPFBiH - Frigošped



Poduzeće Frigošped je osnovano 1987.godine kao samostalno autoprijevozničko društvo. Prve godine rada usluge transporta su se obavljale pretežno na domaćem tržištu, a nakon toga poduzeće se specijalizuje za pružanje usluga međunarodnog transporta. Prateći

europske standarde u transportu, kompanija se iz godine u godinu razvijala i svoje poslovanje širilo s potrebama i zahtjevima tržišta.

Stručnost i dugogodišnje iskustvo osnove su poslovanja kompanije, a kvalitetom i profesionalnošću osiguravaju najpovoljnije uvjete organizacije međunarodnog i specijalnog transporta. Dugogodišnje iskustvo, vrhunski vozni park, profesionalni i kvalificirani vozači, te stručno rukovodstvo ključ je uspjeha ove kompanije. Više o kompaniji pročitajte [OVDJE](#).

Nova članica Grupacije poslodavaca ZDK pri UPFBiH - Brovis d.d. Visoko

Peradarski kompleks "Brovis" d.d. Visoko nalazi se na lokaciji Donje Moštre, sjeverno od grada Visoko uz magistralni put Sarajevo - Zenica. Najveći je i najmoderniji centar peradarske proizvodnje u BiH, osmišljen i napravljen sa željom zaokruživanja kompletnog lanca proizvodnje i prerade "od farme do trpeze".



Brovis d.d. Visoko je u svom razvoju planski integrirao i razvijao pogone koji omogućavaju kontroliranu proizvodnju – od proizvodnje rasplodnih jaja, najsavremenije inkubatorske stanice u regionu za proizvodnju jednodnevnih pilića, kooperantsku mrežu za tov brojlera s podrškom Veterinarske službe Brovisa, proizvodnju stočne hrane, kao i cjelokupan proces klanja peradi s proizvodnjom mesa peradi i proizvoda od mesa peradi.



UDRUŽENJE POSLODAVACA

UDRUŽENJE POSLODAVACA FBiH
MARŠALA TITA 6, 71 000 SARAJEVO

TEL: 00 387 264 830

FAX: 00 387 33 552 461

MAIL: info@upfbih.ba

WEB: www.upfbih.ba